

李賀歌詩編序

大和五年十月中半夜時舍外有疾呼傳緘書者牧曰必有異亟取火來及發之果集賢學士沈公子明書一通曰我亡友李賀元和中義愛甚厚日夕相與起居飲食賀且死嘗授我平生所著歌詩離爲四編凡二百二十三首數年來東西南北良爲已失去今夕醉解不復得寐即閱理篋帙忽得賀詩前所授我者思理往事凡與賀話言嬉遊一處所一物候一日一夕一觴一飯顯顯然無有忘棄者不覺出涕賀復無家

室子弟得以給養卹問常恨想其人味其言止
矣子厚於我與我爲賀集序盡道其所來由亦
少解我意牧其夕不果以書道不可明日就公
謝且曰世謂賀才絕出前讓居數日牧深惟公
曰公於詩爲深妙竒博且復盡知賀之得失短
長今實敘賀不讓必不能當公意如何復就謝
極道所不敢敘賀公曰子固若是是當慢我牧
因不敢復辭勉爲賀敘然其甚慙唐皇諸孫賀
字長吉元和中韓吏部亦頗道其歌詩雲煙綿
聯不足爲其態也水之迢迢不足爲其情也春

之盎盎不足爲其和也秋之明潔不足爲其格
也風檣陣馬不足爲其勇也瓦棺篆鼎不足爲
其古也時花美女不足爲其色也荒國侈殿梗
莽丘隴不足爲其恨怨悲愁也鯨吐鼉擲牛鬼
蛇神不足爲其虛荒誕幻也蓋騷之苗裔理雖
不及辭或過之騷有感怨刺懟言及君臣理亂
時有以激發人意乃賀所爲無得有是賀能一作
復探尋前事所以深歎恨古今未嘗經道者如
金銅仙人辭漢歌補梁庾肩吾宮體謠求取情
狀離絕遠去筆墨畦逕間亦殊不能知之賀生

二十七年死矣世皆曰使賀且未死少加以理
僕奴命騷可也賀死後凡十有五年京兆杜牧
爲其序

歌詩編目錄

第一卷

隴

西

李

賀

李憑箏瑟引

殘絲曲

還自會稽歌

寄權璩揚敬之

示弟

竹

賦御溝水

憶昌谷山居

七夕

過華清宮

送沈亞之歌

詠懷二首

追和柳惲

春坊正字劔子歌

貴公子夜闌曲

鴈門太守行

大堤曲

蜀國絃

蘇小小歌

夢天

唐兒歌

綠章封事

十二月樂辭

附閏月

天上謠

浩歌

秋來

帝子歌

秦王飲酒

洛姝真珠

李夫人

走馬引

湘妃

南園十三首

第二卷

金銅仙人辭漢歌

古悠悠行

黃頭郎

馬詩二十三首

申胡子臙篲歌

老夫採玉歌

傷心行

湖中曲

黃家洞

屏風曲

南山田中行

貴主征行樂

酒罷張大徹索贈

羅浮山父與葛篇

雜敘皇甫湜

宮娃歌

堂堂

勉愛行

致酒行
公莫舞歌
惱公

長歌續短歌
昌谷北園新笋
感諷五首

三月過行宮

第三卷

追和何謝銅雀妓

送秦光祿北征

酬答二首

畫角東城

嘲謝秀才四首

昌谷讀書示巴童

巴童答

代崔家送客

出城

莫種樹

將發

追賦畫江潭苑四首

病酒寄十四兄

難忘曲

賈公問貴壻曲

夜飲朝眠曲

王濬墓下作

客遊

崇義里滯雨

馮小憐

贈陳商

釣魚詩

奉和二兄追馬歸

答贈

題趙生壁

感春

仙人

河陽歌

花遊曲

春書

安樂宮

胡蝶飛

梁公子

牡丹種曲

後園鑿井

開愁歌

秦宮詩

古鄴城童子謠

青花紫石硯歌

房中思

石城曉

苦晝短

章和二年中

春歸昌谷

昌谷詩

銅駝悲

自昌谷到洛後門

曉入太行山

秋涼詩寄十二兄

第四卷

艾如張

上雲樂

摩多樓子

猛虎行

日出行

苦篁調嘯引

拂舞歌詞

夜坐吟

筵弄引

巫山高

平城下

江南弄

榮華樂

相勸酒

瑤華樂

北中寒

梁臺古怨

公無出門

神絃別曲

綠水辭

沙路曲

上之回

高軒過

貝宮夫人

蘭香神女廟

送韋仁實

別皇甫湜

溪晚涼

官不來

長平箭頭歌

江樓曲

塞下曲

染絲上春機

五粒小松歌

塘上行

呂將軍歌

休洗紅

神絃曲

野歌

神絃

將進酒

美人梳頭歌

月漉漉篇

京城

官街鼓

許公子鄭姬歌

新夏歌

題歸夢

經沙苑

出城別張又新

李賀歌詩編目錄

歌詩編第一卷

李憑箏篋引

隴

西

李

賀

吳絲蜀桐張高秋空白凝雲顏不流江娥啼竹
素女愁李憑中國彈箏篋崑山玉碎鳳凰咿芙
蓉泣露香蘭笑十二門前融冷光二十三絲動
紫皇女媧鍊石補天處石破天驚逗秋雨夢入
神山教神嫗老魚跳波瘦蛟舞吳質不眠倚桂
樹露脚斜飛濕寒兔

殘絲曲

垂楊葉老鶯哺兒殘絲欲斷黃蜂歸綠鬢少年
一作金釵客縹粉壺中沉琥珀花臺欲暮春辭
去落花起作迴風舞榆莢相催不知數沈郎青
錢夾城路

還自會稽歌 并序

庾肩吾於梁時嘗作宮體謠引以應和皇子及
國世淪敗肩吾先潛難會稽後始還家僕意其
必有遺文今無得焉故作還自會稽歌以補其
悲

野粉椒壁黃濕螢滿梁殿臺城應教人秋衾夢

銅輦吳霜點歸鬢身與塘蒲晚脉脉辭金魚羈
臣守拙賤

出城寄權璩楊敬之

草暖雲昏萬里春宮花拂面送行人自言漢劍
當飛去何事還車載病身

示弟

別弟三年後還家十日餘醪醕今夕酒緜帙去
時書病骨獨能在人間底事無何須問牛馬拋
擲任梟盧

竹

入水文光動抽空綠影春露華生筍徑苔色拂
霜根織可承香汗裁堪釣錦鱗三梁曾入用一
節奉王孫

同沈駙馬賦得御溝水

入苑白泱泱宮人正屬黃遶堤龍骨冷拂岸鴨
頭香別館驚殘夢停盃泛小觴幸因流浪處暫
得見何郎

始爲奉禮憶昌谷山居

掃斷馬蹄痕衙迴自閉門長槍江米熟小樹棗
花春向壁懸如意當簾閱角巾大書曾去洛鶴

病悔遊秦土甌封茶葉山杯鑠竹根不知船上
月誰棹滿溪雲

七夕

別浦今朝暗羅帷午夜愁鵲辭穿線月花入曝
衣樓天上分金鏡人間望玉鈎錢塘蘇小小更
值一年秋

過華清宮

春月夜啼鴉宮簾隔御花雲生朱絡暗石斷紫
錢斜玉腕盛殘露銀燈點舊紗蜀王無近信泉
上有芹牙

送沈亞之歌

并序

文人沈亞之元和七年以書不中第返歸于吳江吾悲其行無錢酒以勞又感沈之勤請乃歌一解以勞之

吳興才人怨春風桃花滿陌千里紅紫絲竹斷
驄馬小家住錢塘東復東白藤交穿織書笈短
策齊裁如梵夾雄光寶礦獻春卿煙底鷺波乘
一葉春卿拾材白日下擲置黃金解龍馬攜笈
歸江重入門勞勞誰是憐君者吾聞壯夫重心
骨古人三走無摧捽請君待且事長鞭他日還

轅及秋律

詠懷二首

長卿懷茂陵綠草垂石井彈琴看文君春風吹
鬢影梁王與武帝弃之如斷梗唯留一簡書金
泥太山頂

日夕著書罷驚霜落素絲鏡中聊自笑詎是南
山期頭上無幅巾苦藥已染衣不見清溪魚飲
水得自宜

追和柳惲

汀洲白蘋草柳惲乘馬歸江頭檣樹香岸上胡

蝶飛酒盃箬葉露玉軫蜀桐虛朱樓通水陌沙
暖一雙魚

春坊正字劔子歌

先輩匣中三尺水曾入吳潭斬龍子隙月斜明
刮露寒練帶平鋪吹不起蛟胎皮老蒺藜刺礪
鶻淬花白鵬尾直是荆軻一片心莫教照見春
坊字按絲團金懸麗毅神光欲截籃田玉提出
西方白帝驚嗷嗷鬼母秋郊哭

貴公子夜闌曲

裊裊沉水煙烏啼夜闌景曲沼芙蓉波腰圍白

玉冷

鴈門太守行

黑雲壓城城欲摧甲光向月金鱗開角聲滿天
秋色裏塞土燕脂凝夜紫半卷紅旗臨易水霜
重鼓寒聲不起報君黃金臺上意提攜玉龍爲
君死

大堤曲

妾家住橫塘紅紗滿桂香青雲教縮頭上髻明
月與作耳邊璫蓮風起江畔春大堤上留北人
郎食鯉魚尾妾食猩猩脣莫指襄陽道綠浦歸

帆少今日菖蒲花明朝楓樹老

蜀國絃

楓香晚花靜錦水南山影驚石墜猿哀竹雲愁
半嶺涼月生秋浦玉沙粼粼光誰家紅淚客不
忍過瞿塘

蘇小小歌

幽蘭露如啼眼無物結同心煙花不堪翦草如
茵松如蓋風爲裳水爲珮油辟車久相待冷翠
燭勞光彩西陵下音風吹雨

夢天

老兔寒蟾泣天色雲樓半開壁斜白玉輪軋露
濕團光鸞珮相逢桂香陌黃塵清水三山下更
變千年如走馬遙望齊州九點煙一泓海水杯
中瀉

唐兒歌

杜幽公之子

頭玉硤硤眉刷翠杜郎生得真男子骨重神寒
天廟器一雙瞳人翦秋水竹馬梢梢搖綠尾銀
鸞睽光踏半臂東家嬌娘求對值濃笑畫空作
唐字眼大心雄知所以莫忘作歌人姓李

綠章封事

爲吳道士夜醮作

青霓扣額呼宮神，鴻龍玉狗開天門。石榴花發
滿溪津，漢一作女洗花，染白雲。綠章封事諮元
父，六街馬蹄浩無主。虛空風氣不清冷，短衣小
冠作塵土。金家香街千輪鳴，揚雄秋室無俗聲。
願攜漢戟招書鬼，休令恨骨填蒿里。

河南府試十二月樂辭 并閏月

正月

上樓迎春新春歸，暗黃著柳宮漏遲。薄薄淡靄
弄野姿，寒綠幽風生。短絲錦牀曉，卧玉肌冷露。
臉未開，對朝暝。官街柳帶不堪折，早晚菖蒲勝

縮結

二月

飲酒採桑津，宜男草生蘭笑人。蒲如交劔風如
薰，勞勞胡鷺怨。酣春薇帳逗煙生，綠塵金翅蛾
髻愁。暮雲沓颺起舞真珠裙，津頭送別唱流水。
酒客背寒南山死。

三月

東方風來滿眼春，花城柳暗愁幾人。複宮深殿
竹風起，新翠舞衿淨如水。光風轉蕙百餘里，暖
霧驅雲撲天地。軍裝宮妓掃蛾淺，搖搖錦旗夾

城暖曲水漂香去不歸梨花落盡成秋苑

四月

曉涼暮涼樹如蓋千山濃綠生雲外依微香雨
青氛氲膩葉蟠花照曲門金塘閑水搖碧漪老
景沉重無驚飛墮紅殘萼暗參差

五月

雕玉押簾上輕縠籠虛門井汲鉛華水扇織鴛
鴦文迴雪舞涼殿甘露洗空綠羅袖從徊翔香
汗霑寶粟

六月

裁生羅伐湘竹帔拂疎霜簟秋玉炎炎紅鏡東
方開暈如車輪上徘徊啾啾赤帝騎龍來

七月

星依雲渚冷露滴盤中圓好花生木末衰蕙愁
空園夜天如玉砌池葉極青錢儻舞衫薄稍
知花簟寒曉風何拂拂北斗光闌干

八月

嬾妾怨長夜獨客夢歸家傍簷蟲緝絲向壁燈
垂花簷外月光吐簾中樹影斜悠悠飛露姿點
綴池中荷

九月

離宮散螢天似水竹黃池冷芙蓉死月綴金鋪
光脉脉涼苑虛庭空澹白霜花飛飛風草草翠
錦爛斑滿層道雞人罷唱曉瓏璵鴟啼金井下
踈桐

十月

玉壺銀箭稍難傾釵花夜笑凝幽明碎霜斜舞
上羅幕燭龍兩行照飛閣珠帷怨卧不成眠金
鳳刺衣著體寒長眉對月鬪彎環

十一月

宮城團迴凜嚴光白天碎碎墮瓊芳撾鐘高飲
千日酒却天凝寒作君壽御溝泉合如環素火
井溫泉在何處

十二月

日脚淡光紅灑灑薄霜不銷桂枝下依稀和氣
排冬嚴已就長日辭長夜

閏月

帝重光年重時七十二候迴環推天官玉琯灰
荆飛今歲何長來歲遲王母移桃獻天子羲氏
和民迂龍轡

天上瑤

天河夜轉漂迴星銀浦流雲學水聲玉宮桂樹
花未落仙妾採香垂珮纓秦妃卷簾北窻曉窻
前植桐青鳳小王子吹笙鵝管長呼龍耕煙種
瑤草粉霞紅綬藕絲裙青洲步拾蘭苕春東指
羲和能走馬海塵新生石山下

浩歌

南風吹山作平地帝遣天吳移海水王母桃花
千遍紅彭祖至咸幾迴死青毛驄馬參差錢嬌
春楊柳含細煙翠人勸我金屈卮神血未凝身

問誰不須浪飲丁都護世上英雄本無主買絲
繡作平原君有酒唯澆趙州土漏催水咽玉蟾
蜍衛娘髮薄不勝梳看見秋眉換新綠二十男
兒那刺促

秋來

桐風驚心壯士苦衰燈絡緯啼寒素誰看青簡
一編書不遣花蟲粉空蠹思牽今夜腸應直雨
冷香魂弔書客秋墳鬼唱鮑家詩恨血千年土
中碧

帝子歌

洞庭明月一千里涼風鴈啼天在水九節菖蒲
石上死湘神彈琴迎帝子山頭老桂吹古香雌
龍怨吟寒水光沙浦走魚白石郎閑取真珠擲
龍堂

秦王飲酒

秦王騎虎遊八極劍光照空天自碧羲和敲日
玻璃聲劫灰飛盡古今平龍頭瀉酒邀酒星金
槽琵琶夜振振洞庭雨脚來吹笙酒酣喝月使
倒行銀雲擲擲瑤殿明宮門掌事報一更花樓
玉鳳聲嬌獍海綃紅文香淺清黃鵝跌舞千年

觥仙人燭樹蠟煙輕清琴醉眼淚泓泓

洛姝真珠

真珠小娘下青廊洛苑香風飛綽綽寒鬢斜釵
玉鸞光高樓唱月敲懸璫蘭風桂露洒幽翠紅
絃裏雲咽深思花袍白馬不歸來濃蛾疊柳香
脣醉金鵝屏風蜀山夢鸞裾鳳帶行煙重八驄
籠晃臉差移日絲繁散暝羅洞市南曲陌無秋
涼楚腰衛鬢四時芳玉喉窸窸排空光牽雲曳
雪留陸郎

李夫人

紫皇宮殿重重開
夫人飛入瓊瑤臺
綠香繡帳何時歇
青雲無光宮水咽
翩聯桂花墜
秋月孤鸞驚啼
商絲發紅壁
闌珊懸珮璫
歌臺小妓遙相望
玉蟾滴水雞人唱
露華蘭葉參差光

走馬引

我有辭鄉劍
玉鋒堪截雲
襄陽走馬客
意氣自生春
朝嫌劍花淨
暮嫌劍光冷
能持劍向人不解持照身

湘妃

筠竹千年老不死
長伴秦娥蓋湘水
蠻娘吟弄

滿寒空
九山靜
綠淚花紅
離鸞別鳳
煙梧中
巫雲蜀雨
遙相通
幽愁秋氣上
青楓涼夜波
間吟古龍

南園十三首

花枝草蔓眼中開
小白長紅越女腮
可憐日暮嬌香落
嫁與春風不用媒

宮北田塍曉氣酣
黃桑飲露翠宮簾
長腰健婦偷攀折
將餒吳王八繭蠶

竹裏綠絲桃網車
青蟬獨噪日光斜
桃膠迎夏香琥珀
自課越傭能種瓜

三十未有二十餘白日長飢小甲蔬橋頭長老
相哀念因遺戎韜一卷書

男兒何不帶橫刀收取關山五十州請君暫上
凌煙閣若箇書生萬戶侯

尋章摘句老彫蟲曉月當簾挂玉弓不見年年
遼海上文章何處哭秋風

長卿牢落悲空舍曼倩恢諧取自容見買若耶
溪水劒明朝歸去事猿公

春水初生乳鷺飛黃蜂小尾撲花歸窻含遠色
通書幌魚擁香鈎近石磯

泉沙罽卧鴛鴦暖曲岸迴篙舫艫遲瀉酒木攔
椒葉蓋病容扶起種菱絲

邊壤今朝憶蔡邕無心裁曲卧春風舍南有竹
堪書字老去溪頭作釣翁

長巖谷口倚嵇家白晝千峯老翠華自履藤鞋
收石蜜手牽苔絮長莖花

松溪黑水新龍卵桂洞生硝舊馬牙誰爲虞卿
裁道帔輕綃一疋染朝霞

小樹開朝迳長茸濕夜煙柳花驚雪浦交雨漲
溪田古刹踈鐘度遙嵐破月懸沙頭敲石火燒

竹照漁船

李賀歌詩編第一卷

李賀歌詩編第二卷

金銅仙人辭漢歌 并序

魏明帝青龍元年八月詔宮官牽車西取漢孝
武捧露盤仙人欲立置前殿宮官既折盤仙人
臨載乃潜然淚下唐諸王孫李長吉遂作金銅
仙人辭漢歌

茂陵劉郎秋風客夜聞馬嘶曉無跡盡攔桂樹
懸秋香三十六宮土花碧魏官牽車指千里東
關酸風射眸子空將漢月出宮門憶君清淚如
鉛水衰蘭送客咸陽道天若有情天亦老攜盤

獨出月荒涼渭城已遠波聲小

古悠悠行

白景歸西山碧華土迢迢今古何處盡千歲隨
風飄海沙變成石魚沫吹秦橋空光遠流浪銅
柱從年消

黃頭郎

黃頭郎撈攏去不歸南浦芙蓉影愁紅獨自垂
水弄湘娥珮竹啼山露月玉瑟調青門石雲爲
黃葛沙上蘼蕪花秋風已先發好持掃羅薦香
出鴛鴦熱

馬詩二十三首

龍脊貼連錢銀蹄白踏煙無人織錦韉誰爲鑄
金鞭

臘月草根甜天街雪似鹽未知口硬軟先擬疾
藜銜

忽憶周天子驅車上玉山鳴騶辭鳳苑赤驥最
承恩

此馬非凡馬房星本是星向前敲瘦骨猶自帶
銅聲

大漠沙如雪燕山月似鉤何當金絡腦快走踏

清秋

飢卧骨查牙麤毛刺破花鬣焦朱色落髮斷鋸
長麻

西母酒將闌東王飯已乾君王若燕去誰爲拽
車轅

赤兔無人用當須呂布騎吾聞果下馬羈策任
蠻兒

颺叔死忽忽如今不羨龍夜來霜壓棧駁骨折
西風

催榜渡烏江神騅泣向風吾王今解劍何處逐

英雄

內馬賜宮人銀韉刺騏驎午時鹽坂上蹭蹬溘
風塵

批竹初攢耳桃花未上身他時須攬陣牽去借
將軍

寶玦誰家子長聞俠骨香堆金買駿骨將送楚
襄王

香襍赭羅新盤龍蹙鐙鱗迴看南陌上誰道不
逢春

不從桓公獵何能伏虎威一朝溝隴出看取拂

雲飛

唐劍斬隋公拳毛屬太宗莫嫌金甲重且去捉
颯風

白鐵剉青禾碓間落細莎世人憐小頸金埒畏
長牙

伯樂向前看旋毛在腹間抵今培白草何日驀
青山

蕭寺馱經馬元從空國來空知有善相不解走
章臺

重圍如鷲尾寶劍似魚腸欲求千里脚先采眼

中光

暫繫騰黃馬仙人上綵樓須鞭玉勒吏何事謫

高州

汗血到王家隨鸞撼玉珂少君騎海上人見是

青驪

武帝愛神仙燒金得紫煙殿中皆肉馬不解上
青天

申胡子觴筮歌 并序

申胡子朔客之蒼頭也朔客李氏本亦世家子
得祀江夏王廟當年踐履失序遂奉官北郡自

稱學長調短調久未知名今年四月吾與對舍
於長安崇義里遂將衣質酒命予合飲氣熟杯
闌因謂吾曰李長吉爾徒能長調不能作五字
歌詩直強迴筆端與陶謝詩勢相遠幾里吾對
後請撰申胡子鬻策歌以五字斷句歌成左右
人合譟相唱朔客大喜擎觴起立命花娘出幕
徘徊拜客吾問所宜稱善平弄於是以弊辭配
聲與予爲壽

顏熱感君酒含嚼蘆中聲花娘窈窕安休睡芙
蓉屏誰截太平管列點排空星直貫開花風天

上驅雲行今夕歲華落令人惜平生心事如波
濤中坐時時驚朔客騎白馬劔弋懸蘭纓俊健
如生猿肯拾蓬中螢

老夫採玉歌

採玉採玉須水碧琢作步搖徒好色老夫飢寒
龍爲愁藍溪水氣無清白夜雨崗頭食秦子杜
鵲口血老夫淚藍溪之水散生人身死千年恨
溪水斜山栢風雨如嘯泉脚桂繩青裏裏村寒
白屋念嬌嬰古臺石磴懸腸草

傷心行

咽咽學楚吟病骨傷幽素秋姿白髮生木葉啼
風雨燈青蘭膏歇落照飛蛾舞古壁生凝塵羈
魂夢中語

湖中曲

長眉越沙採蘭若桂葉水蒸春漠漠橫船醉眠
白晝閑渡口梅風歌扇薄燕釵玉股照青渠越
王嬌郎小字書蜀紙封巾報雲鬢晚漏壺中水
淋盡

黃家洞

雀步蹙沙聲促促四尺角弓青石鏃黑幡三點

銅鼓鳴高作猿啼搖箭服綵布纏躄幅半斜溪
頭簇隊映芎花山潭晚霧吟白鼉竹蛇飛蠹射
金沙閑驅竹馬緩歸家官軍自殺容州槎

屏風曲

蝶棲石竹銀交關水凝綠鴨瑠璃錢團迴六曲
抱膏蘭將鬢鏡上擲金蟬沉香火煖茱萸煙酒
觥縮帶新承懽月風吹露屏外寒城上烏啼楚
女眠

南山田中行

秋野明秋風白塘水漻漻蟲嘒嘒雲根苔蘚山

上石冷紅泣露嬌啼色荒畦九月稻叉牙螿螢
低飛隴逕斜石脉水流泉滴沙鬼燈如漆照松
花

貴主征行樂

奚騎一作妓黃銅連鑠甲羅旗香榦金畫葉中軍
留醉河陽城嬌嘶紫燕踏花行春營騎將如紅
玉走馬稍鞭上空綠女垣秦月角啣啣牙帳未
開分錦衣

酒罷張大撤索贈時張初効潞幕

長鬣張郎三十一天遣裁詩花作骨往還誰是

龍頭人公主遣秉魚須笏太行青草上白衫匣
中章奏密如蠶金門石閣知卿有豸角雞香早
晚含隴西長吉摧頽客酒闌感覺中區窄葛衣
斷碎趙城秋吟詩一夜東方白

羅浮山父

一作人與葛篇

依依宜織江雨空雨中一月蘭臺風博羅老仙
時出洞千歲石牀啼鬼工蛇毒濃吁洞堂濕江
魚不食銜沙立欲翦箱中一尺天吳娥莫道吳
刀澁

仁和里雜敘皇甫湜

湜新尉陸渾

大人乞馬癯乃寒宗人貸宅荒厥垣橫庭鼠逕
空土溢出籬大棗垂朱殘安定美人截黃綬脫
落纓裾暝朝酒還家白筆未上頭使我漳聲落
人後枉辱稱知犯君眼排引纔陞強絀斷洛風
送馬入長關闔扇未開逢狹犬那知堅都相草
草客枕幽單看春老歸來骨薄面無膏疫氣衝
頭鬢莖少欲彫小說干天官宗孫不調爲誰憐
明朝下元復西道崆峒敘別長如天

宮娃歌

蠟光高懸照紗空花房夜擣紅守宮象口吹香

毳毼暖七星挂城聞漏板寒入罌愚殿影昏彩
鸞簾額著霜痕啼蛄弔月鉤欄下屈膝銅鋪鏤
阿甄夢入家門上沙渚天河落處長洲路願君
光明如太陽放妾騎魚撒波去

堂堂

堂堂復堂堂紅脫梅灰香十年粉蠹生畫梁飢
蟲不食推碎菡萏花已老桃葉長禁院懸簾隔
御光華清源中礪石湯徘徊白鳳隨君王

勉愛行二首送小季之廬山

洛郊無俎豆弊廩慙老馬小鴈過鑪峯影落楚

水下長船倚雲泊石鏡秋涼夜豈解有鄉情弄
月聊鳴啞

別柳當馬頭官槐如鬼目欲將千里別持我易
斗粟南雲北雲空脉斷靈臺經絡懸春綫青軒
樹轉月滿牀下國飢兒夢中見維爾之昆二十
餘年來持鏡頗有鬚辭家三載今如此索米王
門一事無荒溝古水光如刀庭南拱柳生蟻螯
江干幻客真可念郊原晚吹悲號號

致酒行

零落棲遲一杯酒主人奉觴客長壽主父西游

困不歸家人折斷門前柳吾聞馬周昔作新豐
客天荒地老無人識空將牋上兩行書直犯龍
顏請恩澤我有迷魂招不得雄雞一聲天下白
少年心事當拏雲誰念幽寒坐鳴呢

長歌續短歌

長歌破衣襟短歌斷白髮秦王不可見旦夕成
內熱渴飲壺中酒飢拔隴頭粟淒淒四月闌千
里一時綠夜峯何離離明月落石底徘徊沿石
尋照出高峯外不得與之遊歌成鬢先改

公莫舞歌并序

公莫舞歌者詠項伯翼蔽劉沛公也會中壯士
灼灼於人故無復書且南北樂府率有歌引賀
陋諸家今重作公莫舞歌云

方花古礎排九楹刺豹淋血盛銀鬕華筵鼓吹
無桐竹長刀直立割鳴箏橫擘麕錦生紅緯日
炙錦媯王未醉腰下三看寶玦光項莊掉箭攔
前起材官小臣公莫舞座上真人赤龍子芒碭
雲瑞抱天迴咸陽王氣清如水鐵樞鐵捷重束
關大旗五丈撞雙鑲漢王今日須秦印絕臙剗
腸臣不論

昌谷北園新笋四首

籜落長竿削玉開君看母笋是龍材更容一夜
抽千尺別却池園數寸泥

斫取青光寫楚辭膩香春粉黑離離無情有恨
何人見露晷煙啼千萬枝

家泉十眼兩三莖曉看陰根紫脉生今年水曲
春沙上笛管新篁拔玉青

古竹老梢惹碧雲茂陵歸卧歎清貧風吹千畝
迎雨嘯鳥重一枝入酒樽

惱公

宋玉愁空斷嬌饒粉自紅歌聲春草露門掩杏
花叢注口櫻桃小添眉桂葉濃曉奩粧秀靨夜
帳減香筒鈿鏡飛孤鵲江圖畫水滢波陀梳碧
鳳腰裏帶金蟲杜若含清露河蒲聚紫茸月分
蛾黛破花合靨朱融髮重疑盤霧腰輕乍倚風
密書題豈寇隱語笑芙蓉莫鑠茱萸休開翡
翠籠弄珠驚漢燕燒蜜引胡蜂醉纈拋紅網單
羅挂綠蒙數錢教姹女買藥問巴賈勻臉安斜
鴈移燈想夢熊腸攢非束竹肱急是張弓晚樹
迷新蝶殘蛺憶斷虹古時填激澥今日鑿崆峒

繡沓褰長幔羅裙結短封心搖如舞鶴骨出似
飛龍井檻淋清漆門鋪綴白銅隈花開兔逕向
壁印狐蹤玳瑁釘簾薄琉璃疊扇烘象牀綠素
拍瑤席卷香葱細管吟朝幌芳醪落夜楓宜男
生楚巷梔子發金墉龜甲開屏遊鵝毛滲墨濃
黃庭留衛瓘綠樹養韓馮雞唱星懸柳鷓啼露
滴桐黃娥初出座寵妹始相從蠟淚垂蘭燼秋
蕪掃綺櫳吹笙翻舊引沽酒待新豐短珮愁填
粟長絃怨削菘曲池眠乳鴨小閣睡娃僮褥縫
窠雙綫鈎縮瓣五總蜀烟飛重錦峽雨濺輕容

拂鏡羞溫嶠薰衣避賈充魚生玉藕下人在石
蓮中含水鸞蛾翠登樓漢馬髮使君居曲陌園
令住臨邛桂火流蘇暖金爐細炷通春遲王子
態鶯囀謝娘慵玉漏三星曙銅街五馬逢犀株
防膽怯銀液鎮心忪跳脫看年命琵琶道吉凶
王時應七夕夫位在三宮無力塗雲母多玄帶
藥翁符因青鳥送囊用絳紗縫漢苑尋官柳河
橋闕禁鐘月明中婦覺應笑畫堂空

感諷五首

合浦無明珠龍洲無木奴足知造化力不給使

君須越婦未織作吳蠶始蠕蠕縣官騎馬來寧
色虬紫鬚懷中一方板板上數行書不因使君
怒焉得詣爾廬越婦拜縣官桑牙今尚小會待
春日晏絲車方擲掉越婦通言語小姑具黃梁
縣官踏食去簿吏復登堂

竒俊無少年日車何躡躡我待紆雙綬遺我星
星髮都門賈生墓青蠅久斷絕寒食搖揚天憤
景長肅殺皇漢十二帝唯帝稱睿哲一夕信豎
兒文明永淪歌

南山何其悲鬼雨灑空草長安夜半秋風前幾

人老低迷黃昏逕裏
青櫟道月午樹無影
一山唯白曉漆炬迎
新人幽壙螢擾擾

星盡四方高萬物知
天曙已生須已養荷
擔出門去君平久不
反康伯循國路曉思
何澆澆闌闌千人語

石根秋水明石畔秋
草瘦侵衣野竹香蟄
蟄垂葉厚岑中月歸
來蟾光掛空秀桂露
對仙娥星星下雲逗
淒涼梔子落山壘泣
清漏下有張仲蔚披
書案將朽

三月過行宮

渠水紅繁擁御墻
風嬌小葉學娥粧
垂簾幾度青春老
堪鑠千年白日長

李賀歌詩編第二卷

李賀歌詩編第三卷

追和何謝銅雀妓

佳人一壺酒秋客滿千里石馬卧新煙
憂來何所似歌聲且潛弄陵樹風自起
長裾墜高臺淚眼看花机

送秦光祿北征

北虜膠堪折秋沙亂曉輦
髯胡頻犯塞驕氣似橫霓
灞水艤船渡營門細柳開
將軍馳白馬豪彥騁雄材
箭射攬槍落旗懸日月低
榆稀山易見甲重馬頻嘶
天遠星光沒沙平草葉齊
風吹

雲路火雪汗玉關泥屢斷呼韓頸曾燃董卓臍
太常猶舊寵光祿是新階寶玦騏驎起銀壺狒
狢啼桃花連馬發綵絮撲鞍來呵臂懸金斗當
脣注玉壘清蘇和碎蟣紫膩卷浮盃虎鞞先蒙
馬魚腸且斷犀趁趨西旅狗蹙頰北方奚守帳
燃香暮看鷹永夜棲黃龍就別鏡青冢念陽臺
周處長橋役侯調短弄哀錢塘階鳳羽正室擘
鸞釵內子攀琪樹羌兒奏落梅今朝擎劔去何
日刺蛟迴

酬荅二首

金魚公子夾衫長密裝腰鞞割主方行處春風
隨馬尾柳花偏打內家香
雍州二月海池春御水鵝鵲暖白蘋試問酒旗
歌板地今朝誰是拗花人

畫角東城

河轉曙蕭蕭鷓鴣飛睥睨高帆長標越甸壁冷挂
吳刀淡菜生寒日鮪魚喫白濤水花霑抹額旗
鼓夜迎潮

謝秀才有妾縞練改從於人秀才引留
之不得後生感憶座人製詩嘲謝賀復

繼四首

誰知泥憶雲望斷梨花春荷絲製機練竹葉剪
花裙月明啼阿姊燈暗會良人也識君夫婿金
魚挂在身

銅鏡立青鸞燕脂拂紫綿腮花弄暗粉眼尾淚
侵寒碧玉破瓜後瑤琴重撥絃今日非昔日何
人敢正看

洞房思不禁蜂子作花心灰暖殘香炷髮冷青
蟲簪夜遙燈焰短睡熟小屏深好作鴛鴦夢南
城罷擣砧

尋常輕宋玉今日嫁文鴛戟幹橫龍窟刀環倚
桂窻邀人裁半袖端坐據胡牀淚濕紅輪重栖
鳥上井梁

昌谷讀書示巴童

蟲響燈光薄宵寒藥氣濃君憐垂翅客辛苦尚
相從

巴童答

巨鼻宜山褐扈眉入苦吟非君唱樂府誰識怨
秋深

代崔家送客

行蓋柳煙下馬蹄白翩翩恐隨行處盡何忍重揚鞭

出城

雪下桂花稀啼鳥被彈歸關水乘驢影秦風帽帶垂入鄉誠萬里無印自堪悲卿卿忍相問鏡中雙淚姿

莫種樹

園中莫種樹種樹四時愁獨睡南牀月今秋似去秋

將發

東牀卷席罷護落將行去秋白遥遥空日滿門前路

追賦畫江潭苑四首

吳苑曉蒼蒼宮衣水濺黃小鬟紅粉薄騎馬珮珠長路指臺城迥羅薰袴褶香行雲霑翠輦今日似襄王

寶秣菊衣單蕉花密露寒水光蘭澤葉帶重剪刀錢角暖盤弓易靴長上馬難淚痕霑寢帳勻粉照金鞍

翦翅小鷹斜約根玉鏃花鞦垂粧鈿粟箭服釘

文牙鬻鬻啼深竹鷓鴣老濕沙宮官燒蠟火飛
燼汗鈿華

十騎簇芙蓉宮衣小隊紅練香燠宋鵲尋箭踏
盧龍旗濕金鈴重霜乾玉鐙空今朝畫眉早不
待景陽鐘

潞州張大宅病酒遇江使寄上十四兄

秋至昭關後當知趙國寒繫書隨短羽寫恨破
長戕病客眠清曉踈桐墜綠鮮城鷓鴣啼粉堞軍
吹墜蘆煙岸幘褰紗幌枯塘卧折蓮木牕銀跡
畫石磴水痕錢旅酒侵愁肺離歌繞懦絃詩封

兩條淚露折一枝蘭莎老沙雞泣松乾瓦獸殘
覺騎燕地馬夢載楚溪船椒桂傾長席鱸魴斫
玳筵豈能忘舊路江島滯佳年

難忘曲

古詩有君家誠易
知易知復難忘

夾道開洞門弱楊低畫戟簾影竹華起簫聲吹
日色蜂語繞粧鏡拂蛾學春碧亂繫丁香梢滿
攔花向夕

賈公閭貴壻曲

朝衣不須長分花對袍縫嚶嚶白馬春滿腦黃
金重今朝香氣苦珊瑚澁難枕且要弄風人暖

蒲沙上飲燕語踏簾鉤日虹屏中碧潘令在河
陽無人死芳色

夜飲朝眠曲

觴酣出座東方高腰橫半解星勞勞柳苑鷓啼
公主醉薄露點花蕙園氣玉轉濕絲牽曉水熟
粉生香琅玕紫夜飲朝眠斷無事楚羅之幃卧
皇子

王濬墓下作

人間無阿童猶唱水中龍白草侵煙死秋梨遶
地紅古書平黑石神劔斷青銅耕勢魚鱗起墳

科馬鬣封菊花垂濕露棘逕卧乾蓬松栢愁香
澁南原幾夜風

客遊

悲滿千里心日暖南山石不謁承明廬老作平
原客四時別家廟三年去鄉國旅歌屢彈缺歸
問時裂帛

崇義里滯雨

落莫誰家子來感長安秋壯年抱羈恨夢泣生
白頭瘦馬秣敗草雨沫飄寒溝南宮古簾暗濕
景傳籤籌家山遠千里雲脚天東頭憂眠枕劔

匣客帳夢封侯

馮小憐

灣頭見小憐請上琵琶絃破得春風恨今朝直
幾錢裙垂竹葉帶鬢濕杏花煙玉冷紅絲重齊
宮妾駕鞍

贈陳商

長安有男兒二十心已朽楞伽堆案前楚辭繫
肘後人生有窮拙日暮聊飲酒祇今道已塞何
必須白首淒淒陳述聖披褐鉏俎豆學爲堯舜
文時人責衰偶柴門車轍凍日下榆影瘦黃昏

訪我來苦節青陽陂太華五千仞劈地抽森秀
旁古無寸尋一上戛牛斗公卿縱不憐寧能鑠
吾口李生師太華大坐看白晝逢霜作撲檄得
氣爲春柳禮節乃相去顛顛如芻狗風雪直齊
壇墨組貫銅綬臣妾氣態間唯欲承箕帚天眼
何時開古劍庸一吼

釣魚詩

秋水釣紅蕖仙人待素書菱絲縈獨繭蒲米蟄
雙魚斜竹垂清沼長綸貫碧虛餌懸春蜥蝥鈎
墜小蟾蜍詹子情無限龍陽恨有餘爲看煙浦

上楚女淚霑裾

奉和二兄罷使遣馬歸延州

空留三尺劍不用一丸泥馬向沙場去人歸故
國來笛愁翻隴水酒喜瀝春灰錦帶休驚鴈羅
衣尚鬪雞還吳已渺渺入郢莫淒淒自是桃李
樹何畏不成蹊

荅贈

本作張公子曾名萼綠華沉香燠小像楊柳伴
啼鴉露重金泥冷盃闌玉樹斜琴堂沽酒客新
買後園花

題趙生壁

大婦燃竹根中婦舂玉屑冬暖拾松枝日煙坐
蒙滅木蘚青桐老石井水聲發曝背卧東亭桃
花滿肌骨

感春

日暖自蕭條花悲北郭騷榆穿萊子眼柳斷舞
兒腰上幕迎神燕飛絲送百勞胡琴今日恨急
語向檀槽

仙人

彈琴石壁上翻翻一仙人手持白鸞尾夜掃南

山雲鹿飲寒澗下魚歸清海濱時時漢武帝書
報桃花春

河陽歌

染羅衣秋藍難著色不是無心人爲作臺邛客
花燒中潭城顏郎身已老惜許兩少年抽心似
春草今日見銀牌今夜烏玉燕牛頭高一尺隔
坐應相見月從東方來酒從東方轉觥船飯口
紅蜜炬千枝爛

花遊曲

并序

寒食日諸王妓遊賀入座因採梁簡文詩調賦

花遊曲與妓彈唱

春柳南陌態冷花寒露姿今朝醉城外拂鏡濃
掃眉煙濕愁車重紅油覆畫衣舞裙香不暖酒
色上來遲

春書

朱城報春更漏轉光風催蘭吹小殿草細堪梳
柳長如練卷衣秦帝掃粉趙燕日含畫幕蜂上
羅薦平陽花塢河陽花縣越婦搭機吳蠶作繭
菱汀繫帶荷塘倚扇江南有情塞北無恨

安樂宮

深井桐烏起尚復牽清水未盥邵陵瓜瓶中弄
長翠新成安樂宮宮如鳳凰翅歌迴蠟板鳴左
愴提壺使綠繁悲水曲茱萸別秋子

胡蝶飛

揚花撲帳春雲熱龜甲屏風醉眼纈東家胡蝶
西家飛白騎少年今日歸

梁公子

風彩出蕭家本是菖蒲花南塘蓮子熟洗馬走
江沙御牋銀沫冷長簟鳳窠斜種柳營中暗題
書賜館娃

牡丹種曲

蓮枝未長秦蘅老走馬馱金斲春草水灌香泥
却月盆一夜綠房迎白曉美人醉語園中煙晚
華已散蝶又闌梁王老去羅衣在拂袖風吹蜀
國絃歸霞帔拖蜀帳昏媽紅落粉罷承恩檀郎
謝女眠何處樓庭月明燕夜語

後園鑿井

井上轆轤牀上轉水聲繁絃聲淺情若何荀奉
倩城頭日長向城頭住一日作千年不須流下
去

開愁歌 華下作

秋風吹地百草乾
華容碧影生晚寒
我當二十不得意
一心愁謝如枯蘭
衣如飛鷄馬如狗
臨歧擊劍生銅吼
旗亭下馬解秋衣
請貫宜陽一壺酒
壺中喚天雲不開
白晝萬里閑淒迷
主人勸我養心骨
莫受俗物相填狹

秦宮詩 并序

漢人秦宮將軍梁冀之嬖奴也秦宮得寵內舍故以驕名大譟於人予撫舊而作長辭以馮子都之事相爲對望又云昔有之詩

越羅衫袂迎春風
玉刻騏驎腰帶紅
樓頭曲宴仙人語
帳底吹笙香霧濃
人間酒暖春茫茫
花枝入簾白日長
飛牕複道傳頭飲
十夜銅盤膩燭黃
禿衿小袖調鸚鵡
紫繡麻霞踏哮虎
斫桂燒金待曉筵
白鹿清蘇夜半煮
桐英永巷騎新馬
內屋深屏生色畫
開門爛用水衡錢
卷起黃河向身瀉
皇天厄運猶曾裂
秦宮一生花裏活
鸞篋奪得不還人
醉睡氈毼滿堂月

古鄴城童子謠 劾王粲刺曹操

鄴城中暮塵起
探黑丸斫文吏
棘爲鞭虎爲馬

團團走鄴城下切玉劍射日弓獻何人奉相公
扶輅來關右兒香掃塗相公歸

楊生青花紫石硯歌

端州石工巧如神踏天磨刀割紫雲傭剗抱水
含滿唇暗灑長弘冷血痕紗帷晝暖墨花春輕
漚漂沫松麝薰乾膩薄重立脚勻數寸光秋無
日昏圓毫促點聲靜新孔硯寬頑何足云

房中思

新桂如蛾眉秋風吹小綠行輪出門去玉鑿聲
斷續月軒下風露曉庭自幽澁誰能事貞素卧

聽莎雞泣

石城曉

月落大堤上女垣棲鳥起細露濕團紅寒香解
夜醉女牛渡天河柳煙滿城曲上客留斷纓殘
蛾鬪雙綠春帳依微蟬翼羅橫茵突金隱體花
帳前輕絮鶴毛起欲說春心無所似

苦晝短

飛光飛光勸爾一杯酒吾不識青天高黃地厚
唯見月寒日暖來煎人壽食熊則肥食蛙則瘦
神君何在太一安有天東有若木下置銜燭龍

吾將斬龍足嚼龍肉使之朝不得迴夜不得伏
自然老者不死少者不哭何爲餌一作黃金吞
白玉誰似任公子雲中騎碧驢劉徹茂陵多滯
骨羸政梓棺費鮑魚

章和二年中

雲蕭索田風拂拂交芒如篲黍如粟關中父老
百領襦關東吏人乏詬租健犢春耕土膏黑芎
蒲叢叢沿水脉殷勤爲我下田租百錢攜償一作
賞絲桐客遊春漫光塢花白野林散香神降席
拜神得壽獻天子七星貫斷姮娥死

春歸昌谷

束髮方讀書謀身苦不早終軍未乘傳顏子鬚
先老天網信崇大矯士常慙慙逸目駢甘華羈
心如荼蓼阜雲二三月岑岫相顛倒誰揭頰玉
盤東方發紅照春熱張鶴蓋兔目官槐小思焦
面如病嘗膽腸似絞京國心爛漫夜夢歸家少
發軔東門外天地皆浩浩青樹驪山頭花風滿
秦道宮臺光錯落裝盡偏峯嶠細綠及團紅當
路雜啼笑香氣下高廣鞍馬正華耀獨乘雞棲
車自覺少風調心世語形影祗身焉足樂豈能

脫負擔刻鶴曾無兆
幽幽太華側老栢如建纛
龍皮相排夏翠羽更蕩掉
驅趨委憔悴眺覽強容兒
花蔓闕行輶穀煙暝深微
少健無所就入門愧家老
聽講依大樹觀書臨曲沼
知非出押虎甘作藏霧豹
韓鳥處矰繳湘儵在籠罩
狹行無廓落壯士徒輕躁

昌谷詩

五月二十七日作

昌谷五月稻細青滿平水
遙巒相墅壘頽綠愁墮地
光潔無秋思一作涼曠吹浮媚
竹香滿淒寂粉節塗生翠
華髮垂恨鬢光露泣幽淚
層圍

爛洞曲芳徑老紅醉攢蟲
鏤古柳蟬子鳴高邃大帶
委黃葛紫蒲交狹淚石錢
差復藉厚葉皆蟠膩汰沙
好平白立馬印青字晚鱗
自遨遊瘦鵠暝單跼嘹嘹
濕蝓聲咽源驚濺起紆緩
玉真路近武路巡幸路
神娥蕙花裏苔絮縈澗礫
山實垂頽紫小栢儼重扇
肥松突丹髓鳴流走響韻
壠秋拖光穉鶯唱閔女歌
瀑懸楚練帔風露滿笑眼
駢巖雜舒墜亂條迸石嶺
細頸喧島岵日脚掃昏翳
新雲啓華闕謚謚厭夏光
商風道清氣高眠服玉容
燒桂祀天凡

谷與女山嶺阪相承山即蘭香神女上天處也

遺凡霧衣夜披拂眠壇夢真粹待駕棲鸞老故
宮椒壁圮福昌宮在鴻瓏數鈴響羈臣發涼思
陰藤束朱鍵龍帳著魑魅碧錦帖花攄香衾事
殘貴歌塵蠹木在舞綵長雲似珍壤割繡段里
俗祖風義隣凶不相杵疫病無邪祀鮐皮識仁
惠卍角知覲恥縣省司刑官戶乏詒租吏竹藪
添墮簡石磯引紉餌溪灣轉水帶芭蕉傾蜀紙
岑色晃穀襟孤景拂繁事泉樽陶宰酒月眉謝
郎妓丁丁幽鐘遠矯矯單飛至霞巘殷堦義危
溜聲爭次淡蛾流平碧薄月眇陰悴涼光入澗

岸廓盡山中意漁童下宵網霜禽竦煙翅潭鏡
滑蛟涎浮珠噉魚戲風松瑤匣瑟螢星錦城使
柳綴長縹帶篁掉短笛吹石根綠綠蘚蘆笋抽
丹漬漂旋弄天影古檜拏雲臂愁月薇帳紅罽
雲香蔓刺芒麥平百井閑乘列千肆刺促成紀
人好學鴟夷子

銅駝悲

落魄三月罷尋花去東家誰作送春曲洛岸悲
銅駝橋南多馬客北山饒古人客飲血中酒駝
悲千萬春生世莫徒勞風吹盤上燭厭見桃株

笑銅駝夜來哭

自昌谷到洛後門

九月大野白蒼岑竦秋門寒涼交月末露霰濛
曉昏澹色結晝天心事填空雲道上千里風野
竹蛇涎痕石澗東波聲雞叫清寒晨強行到都
舍解馬投舊隣東家名廖者鄉曲傳姓辛杖頭
非飲酒吾請造其人始欲南去楚又將西適秦
襄王與武帝各自留青春聞道蘭臺上宋玉無
歸魂細縹兩行字蟄蟲蠹秋芸爲探秦臺意豈
命余負薪

七月一日曉入太行山

一夕遶山秋香露溘蒙萊新橋倚雲阪候蟲嘶
露撲洛南今已遠越衾誰爲熟石氣何淒淒老
莎如短鏃

秋涼詩寄正字十二兄

閉門感秋風幽姿任契闊大野生素空天地曠
肅殺光露泣殘蕙蟲響連夜發房寒寸輝薄迎
風絳紗折披書古芸馥恨唱華容歇百日不相
知花光變涼節弟兄誰念慮戕翰旣通達青袍
瘦白馬草簡奏東闕夢中相聚笑覺見半牀月

長思劇尋環亂憂抵覃葛

李賀歌詩編第三卷

李賀歌詩編卷第四

艾如張 艾音又

錦襜褕繡褱襦強飲啄哺爾鷓隴東卧毳滿風
雨莫信龍媒隴西去齊人織網如素空張在野
春平碧中網絲漠漠無形影誤爾觸之傷首紅
艾葉綠花誰剪刻中藏禍機不可測

上雲樂

飛香走紅滿天春花龍盤盤上紫雲三千宮女
列金屋五十絃瑟海上聞天江碎碎銀沙路羸
女機中斷煙素斷煙素縫舞衣八月一日君前舞

摩多樓子

玉塞去金人二萬四千里風吹沙作雲一時渡
遼水天白水如練甲絲雙串斷行行莫苦辛城
月猶殘半曉氣朔煙上赳赳胡馬蹄行人臨水
別隔隴長東西

猛虎行 四言

長戈莫春強弩莫烹乳孫哺子教得生獐舉頭
為城掉尾為旌東海黃公愁見夜行道逢騶虞
牛哀不平何用尺刀壁上雷鳴泰山之下婦人
哭聲官家有程吏不敢聽

日出行

白日下崑崙發光如舒絲徒照葵藿心不照遊
子悲折折黃河曲日從中央轉暘谷耳曾聞若
木眼不見柰爾鏢石胡為銷人羿彎弓屬矢那
不中足令久不得奔詎教晨光夕昏

苦篁調嘯引

請說軒轅在時事伶倫採竹二十四伶倫採之
自崑丘軒轅詔遣中分作十二伶倫以之正音
律軒轅以之調元氣當時黃帝上天時二十三
管咸相隨唯留一管人間吹無德不能得此管

此管沉埋虞舜祠

拂舞歌詞

吳娥聲絕天空雲閑徘徊門外滿車馬亦須生
綠苔樽有烏程酒勸君千萬壽全勝漢武錦樓
上曉望晴寒飲花露東方日不破天光無老時
丹成作蛇乘白霧千年重化玉井土從蛇作土
二千載吳堤綠草年年在背有八卦稱神仙邪
鱗頑甲滑腥涎

夜坐吟

踏踏馬蹄誰見過眼看北斗直天河西風羅幕

生翠波鉛華笑妾顰青蛾爲君起唱長相思簾
外嚴霜皆倒飛明星爛爛東方陸紅霞稍出東
南涯陸郎去矣乘班騅

筮篋引 又曰公無渡河

公乎公乎提壺將焉如屈平沈湘不足慕徐衍
入海誠爲愚公乎公乎牀有菅席盤有魚北里
有賢兄東隣有小姑隴畝油油黍與葫瓦甌濁
醪蟻浮浮黍可食醪可飲公乎公乎其柰居被
髮奔流竟何如賢兄小姑哭嗚嗚

巫山高

碧叢叢高插天大江翻瀾神曳煙楚魂尋夢風
颼然曉風飛雨生苔錢瑤姬一去一千年丁香
筇竹啼老猿古祠近月蟾桂寒椒花墜紅濕雲
間

平城下

飢寒平城下夜夜守明月別劍無玉花海風斷
鬢髮塞長連白空遙見漢旗紅青帳吹短笛煙
霧濕盡龍日晚在城上依稀望城下風吹枯蓬
起城中嘶瘦馬借問築城吏去關幾千里惟愁
裹屍歸不惜倒戈死

江南弄

江中綠霧起涼波天上疊巘紅嵯峨水風浦雲
生老竹渚暝蒲帆如一幅鱸魚千頭酒百斛酒
中倒卧南山綠吳歛越吟未終曲江上團團帖
寒玉

榮華樂

一作東洛梁家謠

鳶肩公子二十餘齒編貝昏繳朱氣如虹蜺飲
如建瓴走馬夜歸叫嚴更徑穿複道遊椒房尫
裘金玦雜花光玉堂調笑金樓子臺下戲學邯
鄲倡口吟舌話稱女郎錦袂繡面漢帝旁得明

珠十斛白壁一雙新詔垂金曳紫光煌煌馬如
飛人如水九卿六官皆望履將迴日月先反掌
欲作江河唯畫地峨峨虎冠上切雲竦劍晨趨
凌紫氛繡段千尋貽皂隸黃金百鎰貺家臣十
二門前張大宅晴春煙起連天碧金鋪綴日雜
紅光銅龍鬣環似爭力瑤姬凝醉卧芳席海素
籠牕空下隔丹穴取鳳充行庖獮獮如拳那足
食金蟾呀呀蘭燭香軍裝武妓聲琅璫誰知花
雨夜來過但見池臺春草長嘈嘈絃吹匝天開
洪崖蕭聲遶天來天長一矢貫雙虎雲笈絕騁

聒早雷亂袖交竿管兒舞吳音綠鳥學言語能
教刻石平紫金解送刻毛寄新兎三皇皇后七
貴人五十校尉二將軍當時飛去逐彩雲化作
今日京華春

相勸酒

羲和騁六轡晝夕不曾閑彈烏崦嵒竹扶馬蟠
桃鞭蓐收旣斷翠柳青帝又造紅蘭堯舜至今
萬萬歲數子將爲傾蓋間青錢白壁買無端丈
夫快意方爲歡臞髯熊何足云會須鍾飲北
海箕踞南山歌淫淫管惜惜橫波好送雕題金

人生得意且如此何用強知元化心相勸酒終
無輟伏願陛下鴻名終不歇子孫綿如石上葛
來長安車駢駢中有梁冀舊宅石崇故園

瑤華樂

穆天子走龍媒八轡冬瓏逐天迴五精掃地凝
雲開高門左右日月環四方錯鏤稜層殷舞霞
垂尾長盤珊江澄海淨神母顏施紅點翠照虞
泉曳雲拖玉下崑山列旆如松張蓋如輪金風
殿秋清明發春八鑿十乘直矗如雲屯瓊鍾瑤席
甘露文玄霜絳雪何足云薰梅染柳將贈君鉛

華之水洗君骨與君相對作真質

北中寒

一方黑照三方紫黃河冰合魚龍死三尺木皮
斷文理百石強車上河水霜花草上大如錢揮
刀不入迷濛天爭滄海水飛凌喧山瀑無聲玉
虹懸

梁臺古愁

梁王臺沼空中立天河之水夜飛入臺前鬪玉
作蛟龍綠粉掃天愁露濕撞鐘飲酒行射天金
虎蹙裘噴血班朝朝暮暮愁海翻長繩繫日樂

當年芙蓉凝紅得秋色蘭臉別春啼脉脉蘆洲
客鴈報春來寥落野篁秋浸白

公無出門

天迷迷地密密熊虺食人鬼雪霜斷人骨嗾犬
信信相索索舐掌偏宜佩蘭客帝遣乘軒灾自
息玉星點劔黃金輓我雖跨馬不得還歷陽湖
波大如山毒虬相視振金環狻猊狻猊吐噉涎
鮑焦一世披草眠顏回十九鬚毛班顏回非血
衰鮑焦不違天天畏遭銜鬻所以致之然分明
猶懼公不信公看呵壁書問天

神絃別曲

巫山小女隔雲別春風松花山上發綠蓋獨穿
香逕歸白馬花竿前子子蜀江風澹水如羅墮
蘭誰泛相經過南山桂樹爲君死雲衫淺污紅
脂花

綠水辭

今宵好風月阿侯在何處爲有傾人色翻成足
愁苦東湖採蓮葉南湖拔蒲根未持寄小姑且
持感愁冤

沙路曲

柳陰半眠丞相樹珮馬釘鈴踏沙路斷燼遺香
裏翠煙燭騎啼鳴上天去帝家玉龍開九關帝
前動笏移南山獨垂重印押千官金窠篆字紅
屈盤沙路歸來聞好語旱火不光天下雨

上之回

上之回大旗喜懸紅雲撻鳳尾劔匣破舞蛟龍
蚩尤死鼓蓬蓬天高慶雷齊墜地地無驚煙海
千里

高軒過

韓貞外愈皇甫侍御
湜見過因而命作

華裾織翠青如葱金環壓轡搖冬瓏馬蹄隱耳

聲隆隆入門下馬氣如虹東京才子文章公二
十八宿羅心曾九精照耀貫當中殿前作賦聲
摩空筆補造化天無功厖眉書客感秋蓬誰知
死草生華風我今垂翅附冥鴻他日不羞蛇作
龍

貝宮夫人

丁丁海女弄金鑲雀釵翹揭雙翅關六宮不語
一生閑高懸銀榜照青山長眉凝綠幾千年清
涼堪老鏡中鸞秋肌稍覺玉衣寒空光帖妥水
如天

蘭香神女廟 三月中作

古春年年在閑綠搖暖雲松香飛晚華柳渚含
日昏沙砌落紅滿石泉生水芹幽篁畫新粉蛾
綠橫曉門弱蕙不勝露山秀愁空春舞珮剪鸞
翼帳帶塗輕銀蘭桂吹濃香菱藕長葦葦看雨
逢瑤姬乘船值江君吹簫飲酒醉結綬金絲裙
走天呵白鹿遊水鞭錦鱗密髮虛鬟飛賦靨凝
花勻團鬢分蛛巢穠眉籠小脣弄蝶和輕妍風
光怯腰身深幃金鴨冷奩鏡幽鳳塵踏霧乘風
歸撼王山上聞

送韋仁實兄弟入關

送客飲別酒千觴無赭顏何物最傷心馬首鳴
金鐸野色浩無主秋明空曠間坐來壯膽破斷
目不能看行槐引西道青梢長攢攢韋郎好兄
弟疊玉生文翰我在山上舍一畝蒿磽田夜雨
叫租吏春聲暗交關誰解念勞勞蒼突唯南山
洛陽城外別皇甫湜

洛陽吹別風龍門起斷煙冬樹東生澁晚紫凝
華天單身野霜上疲馬飛蓬間凭軒一雙淚奉
墜綠衣前

溪晚涼

白狐向月號山風秋寒掃雲留碧空玉煙青濕
白如幢銀灣曉轉流天東溪汀眠鷺夢征鴻輕
連不語細游溶層岫迴岑復疊龍苦篔對客吟
歌筒

官不來題皇甫湜先輩廳

官不來官庭秋老桐錯幹青龍愁書司曹佐走
如牛疊聲問佐官來不官不來門幽幽

長平箭頭歌

漆灰骨末丹水沙淒淒古血生銅花白翎金幹

雨中盡直餘三脊殘狼牙我尋平原乘兩馬驛
東石田蒿塢下風長日短星蕭蕭黑旗雲濕懸
空夜左蒐右蒐啼肌瘦酪瓶倒盡將羊炙蟲棲
鴈病蘆筍紅迴風送客吹陰火訪古汎瀾收斷
鏃折鋒赤壘曾割肉南陌東城馬上兒勸我將
金換簪竹

江樓曲

樓前流水江陵道鯉魚風起芙蓉老曉釵擁鬢
語南風抽帆歸來一日功鼉吟浦口飛梅雨竿
頭酒旗換青苧蕭騷浪白雲差池黃粉油衫寄

郎主新槽酒聲苦無力南湖一頃菱花白眼前
便有千里愁小玉開屏見山色

塞下曲

胡角引北風薊門白於水天含青海道城頭月
千里露下旗濛濛寒金鳴夜刻蕃甲鏢蛇鱗馬
嘶青塚白秋靜見旄頭沙遠席羈愁帳北天應
盡河聲出塞流

染絲上春機

玉甕汲水桐花井舊絲沈水如雲影美人懶態
燕脂愁春梭拋擲鳴高樓綵線結茸背複疊白

拾玉郎寄桃葉爲君挑鸞作腰綬願君處處宜
春酒

五粒小松歌 并序

前謝秀才杜雲卿命予作五粒小松歌予以選
書多事不治曲辭經十日聊道八句以當命意
蛇子蛇孫鱗蜿蜿新香幾粒洪崖飯綠波浸葉
滿濃光細束龍髯鉸刀翦主人壁上鋪州圖主
人堂前多俗儒月明白露秋淚滴石筍溪雲肯
寄書

塘上行

藕花涼露濕花缺藕根澁飛下雌鴛鴦塘水聲
溘溘

呂將軍歌

呂將軍騎赤兔獨攜大膽出秦門金粟堆邊哭
陵樹北方逆氣汗青天劔龍夜叫將軍閑將軍
振袖揮劔鏑玉闕朱城有門閣榼榼銀龜搖白
馬傅粉女郎火旗下怕山鐵騎請金槍遙聞箴
中花箭香西郊寒蓬葉如刺皇天親一作栽養
神驥廐中高拊排蹇蹄飽食青芻飲白水圓蒼
低迷蓋張地九州人事皆如此赤山秀鋌禦時

英綠眼將軍會天意

休洗紅

休洗紅洗多紅色淺卿卿騁少年昨日殷橋見
封侯早歸來莫作弦上箭

神絃曲

西山日沒東山昏旋風吹馬馬踏雲畫弦素管
聲淺繁花裙綵繚步秋塵桂葉刷風桂墜子青
狸哭血寒狐死古壁彩虬金帖尾雨工騎入秋
潭水百年老鴉成木魅笑聲碧火巢中起

野歌

鷓翎羽箭山桑弓仰天射落銜蘆鴻麻衣黑肥
衝北風帶酒日晚歌田中男兒屈窮心不窮枯
榮不等嗔天公寒風又變爲春柳條條看即煙
濛濛

神絃

女巫澆酒雲滿空玉爐炭火香
鼓鼓海神一作寒雲
山鬼來座中紙錢窸窣鳴
颼風相思木帖金舞鸞攢蛾
一嚏重一彈呼星召鬼歆杯盤
山魅食時人森寒終南日色低
平灣神方長在有無間神嗔神
喜師更顏送神萬騎還青山

將進酒

琉璃鍾琥珀濃小槽酒滴眞珠紅
烹龍炮鳳玉脂泣羅屏繡幕圍香
風吹龍笛擊鼉鼓皓齒歌細腰舞
況是青春日將暮桃花亂落如紅
雨勸君終日酪酊醉酒不到劉伶
墳上土

美人梳頭歌

西施曉夢綃帳寒香鬟墮髻半沉
檀轆轤咿啞轉鳴玉驚起芙蓉睡
新足雙鸞開鏡秋水光解鬟臨鏡
立象牀一編香絲雲撒地玉釵落
處無聲膩纖手却盤老鷓色翠滑
寶釵簪不得春風

爛熳惱嬌慵十八鬢多無氣力粧成髮鬢歌不
斜雲裾數步踏鴈沙背人不語向何處下階自
折櫻桃花

月漉漉篇

月漉漉波煙玉莎青桂花繁芙蓉別江木粉態
袂羅寒鴈羽鋪煙濕誰能看石帆乘船鏡中入
秋白鮮紅死水香蓮子齊挽菱隔歌袖綠刺眉
銀泥

京城

驅馬出門意牢落長安心兩事誰向道自作秋

風吟

官街鼓

曉聲隆隆催轉日暮聲隆隆呼月出漢城黃柳
映新簾栢陵飛燕埋香骨碓發千年日長白孝
武秦王聽不得從君翠髮蘆花色獨共南山守
中國幾迴天上葬神仙漏聲相將無斷緣

許公子鄭姬歌

鄭園中請賀作

許史世家外親貴宮錦千端買沉醉銅駝酒熟
烘明膠古隄大柳煙中翠桂開客花名鄭袖入
洛聞香鼎門口先將芍藥獻粧臺後解黃金大

如斗莫愁簾中許合歡清絃五十爲君彈彈聲
咽春弄君骨骨興牽人馬上鞍兩馬八蹄踏蘭
苑情如合竹誰能見夜光玉枕棲鳳凰袷羅當
門刺純綫長翻蜀紙卷明君轉角含商破碧雲
自從小靨來東道曲裏長眉少見人相如塚上
生秋栢三秦誰是言情客蛾鬟醉眼拜諸宗爲
謁皇孫請曹植

新夏歌

曉木千籠真蠟綵落蒂枯香數分在陰枝拳牙
卷縹茸長風迴氣扶葱籠野家麥畦上新壠長

吟徘徊桑柘重刺香滿地菖蒲草雨梁燕語悲
身老三月搖揚入河道天濃地穠柳梳掃

題歸夢

長安風雨夜書客夢昌谷怡怡中堂笑小弟栽
澗菘家門厚重意望我飽饑腹勞勞一寸心燈
花照魚目

經沙苑

野水泛長瀾宮牙開小菑無人柳自春草渚鴛
鴦暖晴嘶卧沙馬老去悲啼展今春還不歸塞
嚶折翅鴈

出城別張又新酬李漢

李子別上國南山崆峒春不聞今夕鼓差慰煎
情人趙壹賦命薄馬卿家業貧鄉書何所報紫
蕨生石雲長安玉桂國戟帶披侯門慘陰地自
光寶馬踏曉昏臘春戲草苑玉輓鳴轆鱗綠網
緹金鈴霞卷清池澹開貫瀉蚨母買冰防夏蠅
時宜裂大袂劍客車盤茵小人如死灰心切生
秋榛皇圖跨四海百姓拖長紳光明霽不發腰
龜徒覓銀吾將譟禮樂聲調摩清新欲使十千
歲帝道如飛神華實自蒼老流采長傾湓沒沒

暗齧舌涕血不敢論今將下東道祭酒而別秦
六郡無勦兒長刀誰拭塵地理陽無正快馬遂
服轅二子美年少調道講清渾譏笑斷冬夜家
庭踈篠穿曙風起四方秋月當東懸賦詩面投
擲悲哉不遇人此別定霑臆越布先裁巾

李賀歌詩編卷第四

臨安府棚前北睦親坊南陳宅經籍鋪印

集外詩目錄

南園

感諷六首

夜來樂

春懷引

有所思

高平縣東私路

龍夜吟

漢唐姬飲酒歌

謠歌

假龍吟歌

莫愁曲

嘲雪

白虎行

啁少年

神仙曲

崑崙使者

聽穎師琴歌

集外詩目錄

集外詩

南園

方領蕙帶折角巾杜若已老蘭苕春南山削秀
 藍玉合小雨歸去飛涼雲熟杏暖香梨葉老草
 梢一作蒲竹柵鎖池痕一作澹鄭公鄉老開酒尊坐
 泛楚奏一作酒吟招菟

假龍吟歌

石軋銅杯吟詠枯瘁蒼鷹一作鸞擺血白鳳下肺
 桂子自落雲弄車蓋木死沙崩惡谿島阿母得
 仙今不老窗中跳汰截清涎隈壩卧水埋金爪

崖磴蒼苔一作蒼吊石髮江君掩帳簷笛折蓮花
去國一千年雨後聞腥猶帶鐵

感諷六首

人間春蕩蕩帳暖香揚揚飛光染幽紅誇嬌來
洞房舞席泥金蛇桐竹羅花牀眼逐春暝醉粉
隨淚色黃王子下馬來曲沼鳴鴛鴦焉知腸車
轉一夕巡九方

苦風吹朔寒沙驚秦木折舞影逐空天畫鼓餘
清節蜀書秋信斷黑水朝波咽嬌魂從回風死
處懸鄉月

雜雜胡馬塵森森邊士戟天教胡馬戰曉雲皆
血色婦人攜漢卒箭箠囊巾幘不慙金印重踉
蹌腰鞬力恂恂鄉門老昨夜試鋒鏑走馬遺書
勲誰能分粉墨

青門

一作鳥又作馬

放彈去馬色連空郊何年帝家物

玉裝鞍上搖去去走犬歸來來坐烹羔千金不
了饌猪肉稱盤臊試問誰家子乃老一作云能佩
刀西山白蓋下賢雋寒蕭蕭

曉菊

泣一作

寒露似悲團扇風秋涼經漢殿班

子泣衰紅本無辭輦意豈見入空宮腰褷珮珠

斷灰蝶生陰松

蝶

一作蜂

飛紅粉臺柳掃吹笙道十日懸戶庭九

秋無衰

一作素

草調歌送風轉杯池白魚小水宴

截香腴菱科映青罩芋蒙

一作茸

梨花滿春昏弄

長嘯

一作笑

唯愁苦花落不悞世衰到撫舊唯銷

傷

一作

蒐南山坐悲峭

莫愁曲

草生龍坡下鴉噪城堞頭何人此城裏城角栽
石榴青絲繫五馬黃金絡雙牛白魚駕蓮船夜
作十里游歸來無人識暗上沉香樓羅牀倚瑤

瑟殘月傾簾鉤今日槿花落明朝桐樹秋莫負
平生意何名何莫愁

夜來樂

紅羅複帳金塗蘇華燈九枝懸鯉魚麗人映月
開銅鋪春水滴酒猩猩沽重一篋香十株赤金
瓜子兼雜麩五絲封青鳥阿侯此笑千萬餘南
軒漢轉簾影踈桐林啞啞挾子烏劒崖鞭節青
石珠白駟吹湍凝霜鬚漏長送珮承胡廬倡樓
嵯峨明月孤新客下馬故客去綠蟬秀黛重拂
梳

嘲雪

昨日發葱嶺今朝下蘭渚喜從千里來亂笑含
春語一作龍沙濕漢旗鳳扇迎秦素久別遼城
鶴毛衣已應故

春懷引

芳蹊密影成花洞柳結濃煙花帶重蟾蜍碾玉
挂明弓捍撥裝金打仙鳳寶枕垂雲選春夢鈿
合碧寒龍腦凍阿侯繫錦頁周郎憑仗東風好
相送

白虎行

火烏日暗崩騰雲秦皇虎視蒼生羣燒書滅國
無暇日鑄劍佩玦惟將軍玉壇設醮思冲天一
世二世當萬年燒丹未得不死藥拏舟海上尋
神仙鯨魚張鬣海波沸耕人半作征人鬼雄豪
氣猛如焰煙無人爲決天河水誰最苦兮誰最
苦報人義士深相許漸離擊筑荆卿歌荆卿把
酒燕丹語劍如霜兮膽如鐵出燕城兮望秦月
天授秦封祚未移袞龍衣點荆卿血朱旗卓地
白虎死漢皇知是真天子

有所思

去年陌上歌離曲今日君書遠遊蜀簾外花開
二月風臺前淚滴千行竹琴心與妾腸此夜斷
還續想君白馬懸雕弓世間何處無春風君心
未肯鎮如石妾顏不久如花紅夜殘高碧橫長
河河上無梁空白波西風未起悲龍梭年年織
素攢雙蛾江山迢遞無休絕淚眼看燈乍明滅
自從孤館深瑣窗桂花幾度圓還缺鴉鴉向曉
鳴森木風過池塘響叢玉白日蕭條夢不成橋
南更問仙人卜

惆少年

青驄馬肥金鞍光龍腦入縷羅衫香美人狹坐
飛瓊觴貧人喚云天上郎別起高樓臨碧篠絲
曳紅鱗出深沼有時半醉百花前背把金丸落
飛鳥自說生來未爲客一身美妾過三百豈知
斲地種苗家官稅頻催勿人織長得積玉誇豪
毅每揖閑人多意氣生來不讀半行書只把黃
金買身貴少年安得長少年海波尚變爲桑田
榮枯遞傳急如箭天公不肯於公偏莫道韶華
鎮長在髮白面皺專相待

高平縣東私路

侵侵榭葉香木花滯寒雨今夕山上秋永謝無人處石磯遠荒澁棠實懸辛苦古者定幽尋呼君作私路

神仙曲

碧峯海面藏靈書上帝揀作神仙居清明笑語聞空虛鬪乘巨浪騎鯨魚春羅書字邀王母共宴紅樓最深處鶴羽衝風過海遲不如却使青龍去猶疑王母不相許垂露娃鬢更傳語

龍夜吟

鬢髮胡兒眼睛綠高樓夜靜吹橫竹一聲似向

天上來月下美人望鄉哭直排士點星藏指暗合清風調宮徵蜀道秋深雲滿林湘江半夜龍驚起玉堂美人邊塞情碧窻皓月愁中聽寒砧能擣百尺練粉淚凝珠滴紅線胡兒莫作隴頭吟隔窻暗結愁人心

崑崙使者

崑崙使者無消息茂陵煙樹生愁色金盤玉露自淋漓元氣茫茫收不得麒麟背上石文裂虬龍鱗下紅枝折何處偏傷萬國心中天夜久高明月

漢唐姬飲酒歌

御服沾霜露天衢長綦棘金隱秋塵妾無人爲
帶飾玉堂歌聲寢芳林煙樹隔雲陽臺上歌鬼
哭復何益鐵劍 光光至兇威屢逼彊梟噬毋
心犇厲索人魄相看兩相泣淚下如波激寧用
清酒爲欲作黃泉客一作不說玉山頽且無飲
中色勉從天帝訴天上寡沈厄無處張總帷如
何望松栢妾身晝團團君魂夜寂寂蛾眉自覺
長頸粉誰憐白矜持昭陽意不肯看南陌

聽穎師琴歌

別浦雲歸桂花渚蜀國絃中雙鳳語芙蓉葉落
秋鸞離越王夜起遊天姥暗珮清臣敲水玉渡
海蛾眉牽一作乘白鹿誰看挾劍赴長橋誰看浸
髮題春竹竺僧前立當吾門梵宮真相眉稜尊
古琴大軫長八尺嶧陽老樹非桐孫涼館聞絃
驚病客藥囊暫別龍鬚席請歌直一作當請卿相
歌奉禮官卑復何益

謠俗

上林胡蝶小試伴漢家君飛向南城去誤落石
榴裙脉脉花滿樹翩翩燕遶雲出門不識路羞

問陌頭人

集外詩

